

Պարոնայք էսէրներ, ի վերջոյ հասկացէք, որ դուք չէք, որ պիտի մեզ կապէք Ռուսաստանի հետ. մենք ողջունում ենք Խորհրդային Ռուսաստանը, եթէ նա ճանաչում է մեր անկախութիւնն ու ազատութիւնը (ծափեր):

Կառավարութեան համար թող պարզ լինի, որ ոչ մի գնով, ոչ մի պարագայում իշխանութեան թուլացում տեղի չպիտի ունենայ: Դուք, պարոնայք նախարարներ, ձեր խելքով, ձեր ամբողջ ուժով, հայ աշխատաւորութեան ու խորհրդարանի հետ միասին պիտի ծեծէք բոլոր դռները, պիտի սպառէք բոլոր միջոցները՝ փրկելու հայ ժողովրդի գոյութիւնն ու նրա հայրենիքի անկախութիւնը: Հայ աշխատաւորութեան վճռական և միահամուռ կամքն է լինել ազատ ու ապրել Միացեալ և Անկախ Հայաստանում: (Երկարատև, քրտնոգոստ ծափահարութիւն, որ կրկնում է մի քանի անգամ):

Ա. Խոնդկարեան (սոց.-յեղ.). — Հին Ռուսաստանում մի թերթ կար՝ «Новое Время», որ ողջունում էր ամէն մի իշխանութիւն. այժմ «Դաշնակցութիւն»-ն է դարձել Ռուսաստանի նկատմամբ: Մենք էլ ենք քննադատում Աղբէջանի կառավարութիւնը, բայց քննադատելով հանդերձ այդ կառավարութիւնը՝ պիտի խոստովանենք, որ ներկան աւելի լաւ է, քան հինը:

Վ. Նաւասարդեան (դաշ.). — Ինչո՞վ է լաւ:

Ա. Խոնդկարեան (սոց.-յեղ.). — Լաւ է հէնց նրանով, որ հինը ունէր ցցած ժանիքներ...

Վ. Նաւասարդեան (դաշնակ.). — Իսկ նորը թաղնած ժանիքներ:

Ա. Խոնդկարեան (սոց.-յեղ.). — Իսկ թէ նորը ի՞նչ ունի, դեռ չգիտենք: Այնուամենայնիւ լաւ է ունենալ թաղնած ժանիքներ, քան ցցած (ծիծաղ դաշնակցականների կողմից): Պարզ է, որ Խորհրդային Ռուսաստանը ազդել է և պէտք է ազդի այդ կառավարութեան վրա: Ի՞նչ պիտի լինի մեր դիրքը: Լաւ բան է, որ մարդ իր գլխի տէրն է և ունի ոյժ իր գլխի տէրը լինելու, բայց մենք ունե՞նք այդ հնարաւորութիւնը: Չպէտք է ընկնել Ֆեաթիշերի յետևից, չպէտք է մի իդէալ գնել և նրա համար կոխ յայտարարել ամբողջ աշխարհին: Ի՞նչ անել ապա — համակերպել, ահա իմ պատասխանը, համակերպել, եթէ, իրօք, գալիս է խորհրդային իշխանութիւնը:

Վ. Խորէնի (դաշ.). — Գալիս է Թիւրքիան և ոչ Ռուսաստանը, մի խեղաթիւրէ՛ք փաստերը:

Ա. Խոնդկարեան. — Բայց համակերպել չի նշանակում, ի հարկէ, տալ ամէն ինչ: Մենք պէտք է աշխատենք ձեռք բերել մաքսիմումը, իսկ եթէ չյաջողուց, պատրաստ պիտի լինենք գիջումների, մինչև մեր անկախութիւնից հրաժարումը: Հայ ժողովրդի Ֆիզիքական գոյութիւնը ելակէտ ունենալով՝ մեզ մնում է մի բան — Հայաստանում ևս յայտարարել խորհրդային իշխանութիւն (բուռն ծիծաղ դաշնակցականների կողմից):

Հաղորդակցութեան նախարար Ա. Ջամալեան (դաշ.). — Պատգամ. Խոնդկարեանն ասաց, թէ Ռուսաստանում մի թերթ կար, որի դերն էր գովել ամէն իշխանութիւն. ես էլ ասում եմ, Հայաստանում կայ մի կուսակցութիւն, որի դերն է գովել ամէն տեսակ իշխանութիւն, որ գալիս է հիւսիսից:

Յայտնի է արդէն, թէ էսէրները ի՞նչ յոյսեր էին կապում Բիչերախովի և Դենիկինի հետ. այսօր յայտնի դարձաւ մի ուրիշ բան ևս, այն, որ սոցիալիստ յեղափոխականների կուսակցութիւնը խորհրդային իշխանութեան գլխին հազար տեսակ լուտանքներ թափելուց յետոյ սկսել է նոյն այդ